



Komunikadu Imprensa

Hodi publika kedas
Dili, 28 Setembru, 2012

Xefe Observasaun Fiona Hall hato'o ohin relatóriu dahikus Misaun Observasaun Eleitoral UE nian durante konferénsia imprensa iha Dili

Fiona Hall nu'udar membru Parlamentu Europa nian no Xefe Misaun Observasaun Eleitoral Uniaun Europeia nian (MOE UE), ne'ebé halo observasaun ba eleisaun lejizlativa iha loron 7 Jullu, 2012, filafali mai Timór hodi hato'o misaun nia relatóriu dahikus.

Durante vizita ne'e, Señora Fiona Hall hasoru Prezidente Repúblika, Taur Matan Ruak, no mós Komisaun Nasionál ba Eleisaun (CNE), ministru-xave sira, representante partidu polítiku sira no parte interesadu sira seluk, inklui sosiedade sivíl. Misaun nia Xefe Observasaun hato'o relatóriu dahikus ba Timor-Leste nia autoridade sira, ne'ebé inklui rekomendasaun oioin ne'ebé buka hadi'ak prosesu eleitoral.

Relatóriu ne'e, hasai ona ba publiku ohin dader durante konferénsia imprensa iha Dili, halibur rezultadu husi observasaun UE nian ne'ebé hetan durante hala'o ninia misaun iha Timor-Leste ba fulan rua. Relatóriu refere hakuak análise luan ida kona-ba eleisaun lejizlativa, hamutuk ho avaliasaun ida kona-ba aspetu oioin eleisaun nian hanesan enkuadramentu legál, serbisu ne'ebé halo husi administrasaun eleitoral, knaar instituisaun Estadu sira nian, ambiente kampaña, hahalok media nian, knaar sosiedade sivíl nian, no mós prosesu vota, sura votus no apuramento, hamutuk ho prosesu halo keixa no hatama rekursu.

Tuir rezultadu mahuluk relatóriu ninian katak eleisaun lejizlativa iha loron 7 Jullu, 2012 hala'o iha kondisaun estabilidade tomak, no ninia administrasaun no supervizaun lidera husi órgaun eleitoral Timor-Leste nian. Loron Eleisaun administra kapás los, lian ne'ebé uza durante kampaña eleitoral baibain kontroladu, no keixa ladún barak ka todan. Ambiente jerál ne'ebé hakmatek iha tempu kampaña atribui ba kontestu política ida-ke favorese liu-tan, duke iha 2007, iha-ne'ebé elite política konkorda ba malu katak eleisaun tenke pasífiku hodi garante retirada forsa ONU no Forsa Estabilizasaun Internasionál, maibé atribui mós ba oinsá administra no supervizona eleisaun ne'e, inklui implementasaun husi rotina sira-ne'ebé estabese ho di'ak atu halakon sentimentu ta'uk kona-ba violénsia eleitoral. Enkuadramentu legal ba eleisaun nian nebe-ke hadia ona inkorporadu ona nudar parte substansial husi rekomendasaun EU EOM 2007. Haktuir lia_menon nebe fo husi MOE EU iha 2007, orgaun administrasaun eleitoral (OAE) iha Timor-Leste, Komisaun Nasionál ba Eleisaun (CNE) no Sekretariadu Tekniku ba Administrasaun Eleitoral (STAE), oras nee metin liu duke iha eleisaun 2007. Maske sei iha difikuldade balun nebe iha relasaun ho serbisu, STAE no CNE konsege halao sira nian knaar komplementa ba malu. STAE organiza eventu hotu-hotu eleisaun nian iha maneira efikas no lalais, maski iha desafiú lojística nian iha parte komunikasaun no transporte. Ba iha ninian parte, CNE halo supervizaun ba STAE nia preparasaun eleitoral ho ativu, tetu no decide keixa sira iha maneira determinadu no buka garante prosesu apuramentu nasional lao ho transparente. Tamba nee, CNE halao duni ona ninia knaar tuir Konstitusaun atu halo supervizaun ba STAE nia atividade sira ho independente. Importante diak liu maka neutralidade husi órgaun administrasaun eleitoral, Komisaun Nasionál ba Eleisaun (CNE) no Sekretariadu Tékniku ba



EUROPEAN UNION
Election Observation Mission to Timor-Leste 2012



Administrasaun Eleitorál (STAE), ladún afeta maka'as husi kandidatu sira-ne'ebé kompete iha eleisaun parlamentár; maski relasaun serbisu STAE no CNE nian susar uitoan, sira konsege hala'o sira-nia knaar komplementár.

Maski nune'e, frakeza no desafiu balun ami identifika tiha ona no enkoraja melhoramentu balun atu hodi garante Timor-Leste sei hetan nafatin susesu iha ninia dalan ba hametin prosesu demokrasia ne'ebé fó ona kbiit no fiar-an ba instituisaun sira Timór nian.

Relatóriu refere hakuak rekomendasaun lubun ida kona-ba oinsá hadi'a prosesu eleitorál no sei hetan konsiderasaun husi Governu Repúblika Demokrátika Timor-Leste, Komisaun Nasionál ba Eleisaun (CNE) no Sekretariadu Tékniku ba Administrasaun Eleitorál (STAE), hamutuk ho parte interesadu nasional no internasionál sira seluk. Tuir MOE UE nia hanoin, sira-nia implementasaun sei sai nu'udar kontribuisaun ba hadi'ak eleisaun aban-bainrua nian. Husi rekomendasaun hirak-ne'e, sira-ne'ebé relevante liu mak:

- Rekomendasaun atu introdús provizaun legál kona-ba finansiamentu partidu polítiku sira nian no oinsá uza osan ne'e durante kampaña eleitorál nian, inklui mós ida-ne'ebé estabelese limite ba doasaun no despeza, no sansaun ba kazu viola lei ne'ebé tenke forte natoon hodi hanetik finansiamentu ilegál mosu.
- MOE UE rekomenda katak Parlamentu Nasionál altera lejislasaun ne'ebé daudauk ne'e iha hela hodi haboot liután autoridade STAE nian, ne'ebé mantein ona inventáriu kompletu husi populasaun ne'ebé bele vota, atu permite nia foti responsabilidade adisionál atu mantein rejistu sivíl ida-ne'ebé permanente. Medida ida-ne'e sei simplifika prátika daudaun nian atu mantein baze dadus rua no tipu dokumentu identifikaun rua ne'ebé la hanesan, no mós, hafoin halo kampaña rejistu ne'ebé karu, fó tan sistema ida-ne'ebé bele fiar no efetivu haree ba kustu hodi mantein rejistu sidadaun timoroan sira.
- MOE UE konsidera nu'udar importánsia ne'ebé aas liu ba kualidade demokrátiku husi eleisaun aban-bainrua nian katak governu Timor-Leste no doadór sira kontinua organiza no tulun programa treinamentu ba jornalista sira, nune'e bele lori sira-nia nivel kompeténsia la'o ho prátika jurnalizmu ne'ebé di'ak liu.

MOE UE hala'o nia serbisu iha Timor-Leste hahú kedas iha 26 Maiu to'o iha 24 Julu, 2012, hafoin nia hetan konvite husi Governu Repúblika Demokrátika Timor-Leste nian. Misaun haruka observadór na'in-70 husi estadu-membru UE 25, inklui Suisa no Noruega, ba distritu 13 tomak hodi nune'e sira bele halo avaliasaun ba prosesu eleitorál bazeia ba kompromisu internasionál no rejional ne'ebé foti no mós ba lei Timor-Leste nian. MOE UE la depende ba instituisaun Uniaun Europeia ida seluk hodi to'o ba ninia rezultadu no konkluziun. Bainhira prepara ninia atividade observaun eleitorál, Uniaun Europeia banati-tuir Deklarasaun kona-ba Prinsípiu Observasaun Eleitorál Internasionál ne'ebé selebra iha Nasoins Unidas nia okos iha Outubru 2005.

Bele halo download ba relatóriu dahikus iha website tuirmai ne'e: <http://www.eueom.eu/timorleste2012>

Hakarak informasaun liután, favór kontaktu:

Claudia Aranda

Asesora Imprensa no Analista Media nian

Hp: (670) 77525362

E-mail: claudia.aranda@eueom-timorleste.eu / claudia_aranda2001@yahoo.com.br

Grace Kadja da Cruz

Asistente Asesora Imprensa

Hp: (670) 77313614 E-mail: grace_kadja@yahoo.com